

訂 重

健
行
詩
鈔

戊
寅
閏
秋

初序

余自十七歲學詩，至三十歲時，約存千餘首。今選錄若干，別爲一冊，所以就正有道也。憶余詩情之發，胥由母教。蓋余幼遭逆境，寄食外家，母親針黹自給，恒夜深不輟，每有感，輒爲吟哦聲。嘗夜半擁衾起，抱兒於懷，以胸溫兒背，口誦千家詩，使兒低吟之，以爲樂。時寒齋淒暗，一燈熒然，窗外風雪蕭蕭下也。民國二十四年端陽節。

再序

乙亥夏日，余既有詩鈔之刊，時逾三稔，分贈殆盡。今復增補數十首付梓。且於初刊諸章，稍有改易處。蓋文詞一道，心境逐年而異。舊稿重翻，恒有未愜。但恐村女學妝，刻意求妍，反失本面耳。臨筆悵然。

重訂 健行詩鈔

滿城陳乾吉著

家居

負笈歸來且閉關，栽花酌酒似僧閑。硯池墨飽凝香味，銅鼎年深長綠斑。學畫漸知山水性，讀書如見古人顏。遣懷日日吟哦處，黃土墻低露半山。

對酒

對酒意欣然，投閑似謫仙。門橫千嶺雪，簾捲一江烟。才薄書爲業，家貧硯是田。及時且行樂，豈使利名牽？

旅夜書懷

怯寒常閉戶，歸道且銜卮。撥火溫殘酒，挑燈錄舊詩。戰多增稅急，家遠接書遲。誰信簞瓢士。平居別有思？

春日卽事

遊罷歸來春興賒，啣杯小酌對窗紗。東風似恐幽人寂，吹皺簾波送柳花。

歲末

獨坐空庭思悄然，暫將短笛破愁眠。客中滋味茫茫度，看到梅花又一年。

村外

歲月感蹉跎，人生樂幾何？柳斜風意緊，水淺浪痕多。花發黃於蝶，山高碧似螺。歸來覓新句，閑坐自吟哦。

閑居

世情看破懶張羅，掃地焚香放醉歌。彭澤功名三徑菊，子陵事業一漁簑。鵲巡池畔窺魚出，貓隱花叢待蝶過。滿院春光多樂趣，謀生何苦冒風波？

病後聽雨

支離病骨不禁風。沽酒烹茶仗小僮。詩思鄉愁投筆志，瀟瀟盡付雨聲中。

泛舟

人爲風光始白頭，風光不肯爲人留。鷺鷥亦愛人閑在，遠立沙灘看泛舟。

溪上

好是芳春三月初，迷人淺草綠平蕪。溪頭日落春潮起，一寸蘆芽半尺魚。

野興

一路霜楓葉半丹，布袍吹透晚風寒。閑魚窺月吹圓浪，倦雁驚人避別灘。野棗紅猶留半綠，山梨甜尙帶微酸。男兒及壯無知遇，都把功名付釣竿！

野外

天氣春來晚更溫，亂山缺處見孤村。荒年薄酒成微醉，沙岸殘潮剩退痕。落日寒鴉盤廢塔，護花小犬吠柴門。溪頭忽遇忘形友，滿腹閒情仔細論。

野暮

秋風吹落葉，倦鳥各知還。人語炊煙隔，夕陽紅半山。

秋夜

新寒料峭透征衣，醉臥高軒萬事微。逆事經多心轉豁，故鄉離久夢翻稀。月明蟲語參差起，風定螢光自在飛。最愛中山千日酒，夜來肯爲破愁圍。

登北眺山

危峰千百仞，登覽意悠然。河勢連雲曲，殘陽隔樹圓。亂松風似雨，空谷日如年。欲去誰留住？樵歌起暮烟。

村西

落木蕭蕭野色迷，寒山亂聚小村西。行蹤飄泊萍浮水，身世艱難絮落泥！黃葉板橋僮負酒，夕陽茅舍婦呼鷄。揚鞭細認來時路，欲近柴門馬數嘶。

秋夕家居

牆外垂楊樹，蕭蕭秋意深。捲簾邀月入，移榻避風侵。汲水僮栽竹，憑窗婢聽琴。懷人愁不寐，腸斷幾家砧。

雨霽

雨霽心情爽，尋詩出郭東。斷雲連塔白，斜日隔樓紅。檣影荒烟外，潮聲亂樹中。此間多妙趣，閒坐話漁翁。

登北眺山

飽暖寧非福，清閒卽是仙！慢行雲樹裏，忽到嶺峯巔。平野長河急，孤城

落日圓。老僧喜客至，煮茗話涼天。

家居

行年弱冠正堪爲，埋首江村亦自奇。風定茶烟留院久，日長竹影上窗遲。館僮愛畫常偷稿，鄰叟論詩每過籬。肯把功名同夢看，人生何處不相宜？

窗下閒坐

小窗依短几，對坐慢吟哦。紙薄寒侵早，梅疎月到多。失時成隱志，得酒破愁魔。車馬不相擾，眞稱安樂窩。

卽景

出門無個事，拂石傍流泉。坐愛前堤樹，依依欲化煙。

最好

人生最好是居家，妻伴琴書婢煮茶。買得小園寬一畝，半容鷄犬半栽花。

春日

黃鳥聲中歲又新，柴門深閉絕風塵。遠書每到多傷別，好友常來不厭貧。

碧竹心情虛似士，紅梅骨格傲於人。垂楊爭綠花爭艷，占得人間一半春。
遊公園歸臥榻上口占

遊興方濃日隱山，餘情不盡買車還。縱然一夢身成蝶，只在花亭水榭間。
野外懷幼午君厚

涼風天外起，蕭颯動疎林。紅日催昏曉，青山自古今。別離知誼重，貧賤
感交深。沾得銷愁酒，歸來仔細斟。

題畫

穿林幽徑淨無苔，小戶當山日日開。縱有板橋通隔岸，也無俗客問津來。

閨詞

遠遊千里外，何日是歸期？常愛簾前月，團圓有定時！

雨後遊山寺

一路清涼到水湄，百年廢寺倚山危。蝸牛隱約留殘篆，似和墻陰喜雨詩。

春遊

村南村北日迴旋，自覺身輕健似仙。久立愛聽蕭寺磬，晚歸貪看夕陽船。
尋花山店雲生足，沽酒溪橋月壓肩。最好春光須作樂，月輪能有幾回圓？

村居

村居亦足樂流年，豈必蓬瀛作散仙。負郭峯巒千丈翠，橫門楊柳一溪煙。
婢因移竹遲晨爨，妻爲抄書廢午眠。正是清明好時節，買花莫惜一囊錢。

閒興

小院風停竹不譁，野人吟嘯是生涯。鄰翁借酒常酬棗，遠客敲門忽送瓜。
瘦影穿籬黃翅蝶，暗香浮水白蘋花。小僮偷得無尖筆，塗抹沿牆似老鴉。

問渠影山兩兄自保定來旋又言去

平生心迹最相知，此日相逢豈夢思？一院春風溫似酒，半牆老柳瘦於詩。
交情深極翻嫌淡，聚日無多祇恨遲。滿地干戈何處去？舉杯還請話移時！

夏夜

讀完兩卷船山集，點點燈花落硯臺。嬾婢頑僮都睡去，芭蕉替報雨聲來。

夜聞鼠嚙

小鼠稱雄亦侮余，跳梁登案擾安居。可憐用盡平生力，嚙透青箱乃是書。

寄燕孫

一別鄉關兩度春，梅花落盡柳絲新。多情北眺山頭月，分照天涯地角人。

閒興

牆外長河似帶迴，好風時捲棹歌來。鷄呼雛食分紅豆，犬抱兒眠藉綠苔。舊稿刪留如決獄，好花培養似憐才。良田華屋終何用，且向窗前醉一杯。

憶外祖父

余不幸，慈父遂去江湖。母守節自誓，乃家產蕩盡，舉火艱難。外祖父張普臣公，滿城世家也，遂接養焉。供衣食與家人同。無倦容，無怨言。少時躬親教養，雖寒暑寢食未或間。稍壯，送入邑高小及省師範學校，凡一切所需，無一非外家之物也。每假歸，輒攷問課程殆遍，蓋惟恐其不肖，不能報阿母之苦志也。嘗記某冬夜，大雪紛飛，積地二尺許。狂風怒吼，撲面如割。每風捲雪來，打衣裳綴簷有聲。時余正就讀村塾，夜學欲散。同學輩均有健候候逆，背負以歸。蓋塾位村外故正覺禪寺址，距家尚有里餘也。既而同學盡散，雪益急矣，風益烈

矣。余以六齡弱童。何能冒此險道？師某，固愛余者，欲分榻以宿之。余惟恐外祖父之純念也。未之遽應；然弗應，又不能歸。正躊躇間，忽見朔氣迷漫中，閃閃透燈光，時明時暗，若遠若近，余意村人之夜行耳。未幾，燈漸近，忽聞聲呼曰：乾甥歸未？胡久留耶？吾恐汝之不能獨行，特來携汝！言時若斷若續，蒼爲風雪所吹，寒噤不能成聲者！余趨而視，則六十餘歲之老外祖也。夫以外家之豐，僮僕不下數十，而均弗遣，竟親身來，實欲罄余之心，而努力莫懈也。噫！外祖之心亦苦矣！余之累外祖亦至矣！其後余既入師範之四年多，而外祖以疾卒矣。方病篤時，金聞信急奔，而終未之見也。後聞人云：外祖彌留時，引頸遙望，張口作呼喚勢，聲啞不能明，細辨則似呼余名也。天乎，痛哉！當余父未遠行也，外祖使學書不成，使學賈又不成，羞而去。迄今二十四年，無片言寄家。或言從戎，或言放洋，或言商於哈爾濱。然均遠道傳聞，未之確也。計父去日，余始生二閱月耳。嗚呼！徵外祖吾烏得有今日耶！

常恐愚頑致凍飢，廿年教養費心思。抵今得俸成家室，哭訴泉臺知不知？！

野景

徐水東流淺見沙，桔槔聲裏夕陽斜。小橋牛背兒吹笛，亂柳池頭客聽蛙。
遍野麥浮千頃浪，傍山雲繞一村花。平生只羨垂竿叟，釣得魚歸賣酒家。

憶舊

重訂健行詩鈔

每憶沿村路，時當六月中。荷喧半橋雨，水皺一池風，隔竹聞遊女，歸舟臥釣翁。抵今成隔世，宦海作飄蓬。

秋日家居

宅背高山面小江，野人樂趣信無雙。嫌看醉態妻藏酒，愛聽吟聲婢倚窗。遠寺疎鐘清入耳，誰家短笛吹無腔？功名本是無憑物，欲寄生涯買釣艣。

秋野

蝸廬殊寂寞，掩卷出門遊。處處花相似，年年水自流。蟬聲千樹晚，山色一樓秋。烽火滿天地，何人抱杞憂。

赴友家

出門君舍近，三里隔清溪。熟果迎風落，飛禽繞樹啼。抱瓶僮買酒，磨刃僕烹鷄。肯作連宵會，非關歸路迷。

感懷

廿年潦倒未逢辰，侷促輶駒七尺身。但使終軍能繫虜，安知之武不如人。

謀身世已無強項，爲國誰還肯哭秦？一付膽肝豪氣在，夜深撫劍愴心神。

冬夜

烟勢時舒卷，燈光半滅明。風霜欺客夢，角鼓動邊城。久病疎家信，長貧
熟世情。干戈多浩劫，何處玉簫聲？

送別

也知離合是前因，惟恨同居只兩春。此後風雲一分手，相思都是夢中人！

嘲牽牛

牛郎仙骨也心癡，只會牽牛不會騎。若使騎牛過河去，何須夜夜苦相思？

田間卽景

綠樹陰濃夏日來，田家農事漸相催。一聲短笛斜陽晚，村巷無人牛自回。

野外

紅樹青山好賦詩，詩情又入早秋時。數聲清磬雲迷塔，十里斜陽水滿陂。
曠古才名嘗自許，漫天烽火欲何之！醉來獨上高樓望，拍遍闌干人不知。

秋遊

幽人到處總無愁，只有詩情動不休。四五朵花饒逸趣，兩三點雨逗新秋。山峰出樹通樵徑，鷗鳥隨人上釣舟。薄暮欲歸回首望，疎林隱約酒家樓。

晚眺

獨來城外望，日暮思依依。戎馬三年客，幽燕一布衣。漁歌隨艇遠，雁影逐雲飛。遊罷尋歸路，燈光出翠微。

南園卽景

柳絲嬾娜繫羅衣，南園留連對晚暉。大好風光歸不得，

夕陽影裏
藕花紅處鷺鷥飛。

閒心

小倚欄杆畔，閒心放不收。日長書引睡，鄉遠酒驅愁。夕照紅沉櫓，亂山青到樓。吾身原是福，飽暖復何憂。

不寐

斷簡陳篇誤此生，愧無佳句負詩名。兩行歸雁霜橫岸，一片寒砧月土城。

時蹇空懷投筆志，家貧只剩讀書聲。幽人不寐無聊賴，付與啼螿說此情。

七夕

隔河遙望兩心灰，此夕團圓笑眼開。身是神仙無妙術，不能夜夜過河來。
偶拾殘瓦一片因題之

幾易滄桑尚未銷，拂塵剔蘚認前朝。秦樓負重曾支柱，漢苑凌空也架橋。
斑點如含亡國淚，鏗鏘似奏故宮簫。如何埋沒隨榛棘，受盡風搖又雨漂。

贈郭茂蓮

每羨丰標如玉潤，及觀詩句似冰清。三年萍水緣何晚，萬里關河誼暗縈。
酒爲銷愁常大醉，琴非知己不輕鳴。羨君自有生花筆，獨占騷壇莫敢爭。

駐防保定文昌宮夜作

時余充軍法處長職

班馬無聲人不喧，文昌宮裏欲黃昏。滿階落葉羣僧嬾，古殿殘燈一佛尊。
刑已減輕猶恐重，案經再審尚疑冤。此心自問終無愧，付與千秋青史論。
吳巡閱使夫人賜錢

賞賜殷勤訓語溫，愧無報答只心存。將錢買得如椽筆，字字行行寫厚恩。

家居

居心淡泊復何求？完美家庭幾世修？知足布衣同彩帛，隨安瓦屋勝華樓。略知故典憐妻慧，歷話興亡解母愁。最是飯餘烹茗坐，蟬聲桐影半窗秋。

院內

風捲殘英打畫楹，柳陰夏色又新更。抱花冒雨黃蜂健，點草翻風紫蝶輕。擁座母言先輩事，撫琴妻弄故鄉聲。街前買得君山茗，掃地安爐喚僕烹。

與問渠野望

携手河梁去，秋光到十分。亂山圍野渡，飛鳥破寒雲。人語烟中答，河聲樹裏聞。貧來知己少，青眼獨看君。

秋夜讀書

客齋況味亦蕭清，雙眼還從故紙明。牆角寒蟲燈下客，夜深相對作秋聲。

村外

夕陽沈廢郭，荒草散鷄豚。酒店旗懸樹，漁村網掛門。風聲匝野起，雨氣入天昏。好景隨時樂，何爲羨達尊？

易縣道中

落日沈雲脚，平沙沒馬蹄。地高山勢險，野曠雁行低。涉水兒驅犢，扶籬婦喚鷄。誰憐名利客，向晚尙栖栖。

野暮

曠野蒼烟橫，遠山白石疊。日暮寂無人，西風下黃葉。

張君厚王幼午兩兄攷試各居第二

去歲公名居第二，今年第二又公名。世間萬事都更改，只是文章有定評。

重陽寄閻笏珊表兄

門外殘秋雨似絲，風光蕭索憶前時。從君一別關山隔，剩得黃花是故知。

寄燕孫

經年不見碧梧姿，夜合花開繫別思。九十春光誰管領，半歸我畫半君詩。

閨詞

壯志覓封侯，辭家萬里遊。遙憐風雪夜，何處泊孤舟？

秋日

秋景荒涼睡眼迷，倚欄睨茗曲廊低。竹梢露重無風落，墻角蟲寒到曉啼。曲撰新詞填舊譜，畫臨古本錄原題。門前曠野平如掌，時見飛鴻過水西。

贈內

內子文敏爲吳玉帥第三師師長張儒青長女嗜文字性高介非寒士不嫁有以貴公子讎婚者輒拒焉嘗曰豐於財不若篤於情也及歸余布衣蔬食事姑撫兒備極辛勞而居之晏如也

甘心荆布世應稀，勤儉治家事杼機。自笑貧寒卿見累，買書典盡嫁時衣。

長夏村居

長夏山村興趣深，柴門深閉少人尋。棋防勢弱連環應，詩愛情眞反復吟。催雨雙鳩鳴樹杪，避風小蝶息花陰。閒居莫笑無知己，種菜原來是本心。

雪人

白眉白眼白冠衣，跌坐堦前笑語稀。刮盡地皮深數尺，堆來只爲一身肥。

秋夜懷劉允之尹文興

不寐廳前坐，思君苦緒侵。涼風迴院角，明月定天心。久別書翻少，長貧誼轉深。遙知今夜裏，應有夢相尋。

夜坐

世味茫茫度，花開又一年。國貧搜物稅，吏富聚民錢。風靜茶煙直，松疎月影圓。感懷深不寐，欲着祖生鞭。

春假家居

小園應不異蓬萊，美景良辰兩暗催。鳥啄樹頭紅果落，蛙翻水面綠萍開。戀棋客每深宵去，索畫人常冒雨來。要趁數天休息暇，好花修竹一齊栽。

秋日

秋色來何處，依稀接遠天。日晴花影碎，木落鳥巢圓。貯酒防宵冷，看書引午眠。鄉心與飛雁，同到白雲邊。

秋暮

白水拍天流，獨坐橋頭冷。荒野寂無人，斜陽移樹影。

十五年春赴房山縣防次

漸入山深處，天成錦繡園。年豐千戶樂，城小一官尊。日暖花爭孕，泉危石亂喧。野鴉驚客過，時向樹頭翻。

贈梁角天

自憐愚拙少人知，隱士生涯亦大奇。典硯預沽明日酒，翻書忽得昔年詩。人因海量交方洽，花爲春寒放每遲。一自識君無限好，既成密友又良師。

野外懷和軒三兄

散步城東路，秋風捲碧虛。亂山臨岸斷，一水抱村孤。守道人嘲拙，安貧世笑愚。不知今夜夢，能到故鄉無？

贈房山尹縣長

勝地清幽喜再過，亂山高下晚風和。春深花柳爭遮路，日暮牛羊自渡河。

國似殘棋遭劫盡，人如古硯受磨多。久聞令尹詩名好，欲獻班門且細哦。
懷沈凱臣旅長

轉戰荒寒外，眞稱馬伏波。妙謀虛詐實，奇卒少疑多。暮雨飛狐嶺，斜陽
拒馬河。遙知駐節處，父老奏歡歌。

幽居

辭官且喜得幽居，已是涼秋八月初。花逐風翻猶當蝶，葉飄波動驚疑魚。
文心似水時紆折，詩思如雲自卷舒。檢點行裝成一笑，歸來只剩半囊書。

上姚丹坡夫子四首 選二

古稀夫子倍英明，修養林園意氣平。過眼煙雲留畫稿，關心風月動詩情。
編籬護菊藏秋色，引水栽荷待雨聲。自是老成多德澤，燕臺誰不識公名。

二

早看名利等塵埃，閉戶深居亦快哉。客解事忙留刺去，花嫌院小出牆開。
囑僮護蝶防貓撲，呼僕捲簾待燕回。半日讀書半載酒，芳園彷彿是蓬萊。

九日和闔笏珊表兄原玉

飄零誰與話桑麻，雲雁沙鷗各有家。客舍淚侵佳節酒，戰場血染故園花。豈真亂世生豪傑，早已浮名誤歲華。強去登高時極目，不堪落日蔽殘霞。

保定道中

遠覓封侯去，驅車別故園。急風喧野樹，落日滿漁村。國亂誰遺誤，人貧易感恩。不知今夜裏，何處駐行轅。

城外

不出西郊久，楓林又早秋。山環平野臥，水抱遠村流。犢返兒橫背，花開女插頭。遙看落日處，時動故鄉愁。

客舍

地僻門庭靜，秋光雨後新。酒憐遊客冷，花笑主人貧。鷺渴窺池角，蟬鳴抱樹身。悠悠故園菊，別去又三春。

喜張純容見訪

數載無消息，忽來聚盛筵。人逢明月裏，家在白雲邊。貧賤誰知己，文章不值錢。後期何日是？欲問一悽然！

望月

明月照行人，行人望明月。明月自團圓，行人自離別。

雜感

茫茫苦海欲何歸，萬恨千愁覺昨非。便使春蠶絲盡死，化蛾猶得結雙飛。

通縣夜作

桃源何處是，潞水託遊蹤。獨臥不成寐，潮聲夜入城。

清明野外

東風送暖到天涯，野寺牆頭出杏花。正是清明好時節，酒樓人散夕陽斜。

相憶

關河邈邈夜沉沉，從此都成陌路人。縱使相逢能有夢，醒來翻恨夢非真！

野外卽景

暮春天氣半寒溫，滿地新苔長翠痕。却是詩情遙動處，一灣流水夕陽村。
戰後思家

功名雖好豈如閒，五載風塵撲客顏。遙憶故園烽火裏，未遭浩劫只青山。
寄蔣貢梁兄

少年豪氣獨超羣，敢謂狂名四海聞？縱酒每輕陶處士，談兵曾小李將軍。
母憐久客添新絮，妻爲攻書典舊裙。何日春風人得意，一騰健翮好陵雲。
寄蔣貢梁兄

連夜西風送晚涼，菊花天氣近重陽。酒因知己常忘醉，詩豈驚人共笑狂。
世亂愚爲修福術，家貧書是却愁方。一官碌碌風塵裏，空負曹丘古道腸。
（貢梁兄薦余充北平警備司令部軍法官）

上張桐軒司令

自分飄流誤此生，何期附驥顯聲名。典衣買史連宵讀，把酒吟詩舉座驚。
世事如雲隨景變，官心似水只求平。深情欲報知何日，空慕終軍說請纓。

贈孫訪漁

幾度飄零翰墨林，天涯何幸遇知音。功名早被衣冠誤，交誼翻從患難深。酒爲多愁心易醉，詩緣思苦夢猶吟。風塵十載邯鄲道，空負光陰刻刻金。

無題二首

忽忽一過倍馳神，腸斷蕭娘畫裏身。便使天台春色好，劉郎無奈隔凡塵。長夜漫漫起暗愁，夢中倩影暫爲儔。滿腔苦恨憑誰訴，填入江心水不流！

懷趙二

獨對殘燈憶舊容，離情黯黯恨重重。今生已感相逢苦，但願來生莫再逢。

十九年寒假來第一師範教讀因識楊協庚先生卽以奉贈

翰墨因緣豈預期？鴻詞博學是吾師。卜居對戶猶嫌遠，一見傾心尙恨遲。萬里風霜驚歲暮，十年琴劍客天涯。暢談深夕渾忘倦，月上欄杆松影移。

暑假示諸生

榴火雲峯近暑天，一番小別亦悽然！遙知秋後相逢日，紅樹西風唱暮蟬。

院內

謝客深居值早秋，院中風景也清幽。一魚曬日遊池面，兩蝶爭花墜樹頭。家務常親憐婦苦，書聲時輟笑兒浮。乘車戴笠都閒事，且向村居享自由。

假後返津校

碧水悠悠起暮潮，半肩行李上河橋。兼旬不到經行處，一路秋風長野蒿。

贈楊協老

朔北蒼茫氣，文章屬協公。圖書指掌裏，今古笑談中。一覽江山小，長歌天地空。我生雖恨晚，猶幸識春風。

睡起

何處黃鸝驚夢醒，寂無個事閒睱茗。一窗午日靜無塵，輕輕飛過蝴蝶影。

竹枝詞

新開河畔水泠泠，來往漁舟向岸停。郎問妾家住何處？天津城西楊柳青。

清明野望

作客年年歸思殷，更逢佳節一沾巾。清明日暮行人少，天際野風吹白雲。
新開河畔

青青楊柳夾堤栽，返照中流天倒開。獨上橋頭閒佇望，亂帆葉葉趁潮來。

楊協老賦菜花詩見贈因以奉和

堦前野草豈良材，獨倚春風帶笑開。自有幽香兼麗質，憑誰移向上林栽。

又

一陣清芳斷續來，菜花點點隱牆隈。應嫌攀折傷天性，只向無人到處開。

二十年九月津校因故停課家居無事寫山水小冊十餘幀聊以寫感裝

成題二絕句

剩有班超筆未投，却從蓬牖寫林邱。揮毫無限風塵感，三十年來文字囚。
落寞江湖負盛名，論功何處請長纓？胸中多少傷心事，寫入峯巒盡不平。

冬夜有懷

一夜邊風冷透幃，蕭蕭落木捲窗飛。遙憐塞外征胡將，白雪黃沙正突圍。

吳玉帥由川入陝甘返平因奉兩律 選一

萬衆歡呼動市閭，神威重喜見旗輿。風塵朔漠三年久，戎馬關河百戰餘。
老去情懷須縱酒，英雄事業更攻書。烽烟滿目興亡感，隻手誰將大廈扶！
與楊協老夜坐

常說相逢快此生，登門過訪有餘情。夜深對坐寂無語，門外寒松作雨聲。

春日野望

獨上荒原落日斜，大堤漠漠捲塵沙。春風不解胸中苦，又向人間長歲華。

秋夜感懷

烽火頻驚角鼓悲，山河半壁想依稀。書生自有平戎策，誰肯求才到布衣！

晚眺

宿草離離河水渾，寒鴉飛去欲黃昏。漁家半在堤邊住，十里斜陽紅到門。

過梁任公墓（徐一達兄約遊西山）

生平不識梁夫子，此過忽忽亦愴然。我欲下車一憑弔，晚風吹雪四山寒。

贈劉寶全鼓師

少小曾聞負盛名，於今憔悴不勝情。敲來三十年前鼓，都是寥寥感舊聲！

竹枝詞

新開河畔草如油，王莊橋下春風柔。妾自浣衣郎汲水，水中人影結雙流。

贈某琴師

獨把高名擅藝林，四絃彈出一生心。座中尚有風塵客，莫作悲涼塞下音。

提邊閒坐

不羨河中魚，但愛河邊景。坐久人不來，微風縐橋影。

聽鼓書

余十年前曾聽劉寶全鼓書今觀其神情聲調一如舊昔樓館依然而世事屢變矣

白雪遺音何處尋，更聆清韻一沾巾。十年歌舞猶相似，門外風雲變古今。

題楊協老移家圖三首錄二

圖中畫一車中坐一婦並列圖書傢具等物旁有執轡者有曳車尾者轡下一牛力引而前若不能勝牛蓋協老自喻以寓家室之累也

圖書眷屬有餘情，覓得桃源遠處行。向晚驅車秋色裏，滿堤烟月暮潮生。

又

無邊豪氣動江城，蟠伏鹽車亦自驚。都把興亡家國恨，載將重任赴前程。

歲暮感懷

客裏忽驚歲又終，卅年日月去匆匆。讀書空抱縱橫策，投筆難酬尺寸功。關塞蕭條春草碧，山河破碎夕陽紅。平生自有滄桑感，淚眼茫茫望海東。

水西莊偶懷

水西莊昔爲津名流嚴範孫諸老雅集之所余於重九日獨尋其地古木斜陽悽然生感

故老風流空想像，我生恨晚未追陪。古槐蕭瑟斜陽裏，獨到水西莊上來。

冬日卽景

綠酒紅爐且自溫，書齋清寂似山村。晚來偶倚窗前望，一樹寒鴉雪滿門。

二十三年歲暮感懷

人事悠悠歲月侵，感懷家國動長吟。春回滄海煙波遠，雪滿榆關戰骨深。

搖落愈增千里志，安危誰繫百年心。男兒三十終無補，獨上高樓看日沉。
自題戎裝像片

此日爭傳東野句，當年誰識稼軒才！短衣匹馬秋風路，曾到單于陣上來。

二
拒馬河邊戰鼓頻，飛狐嶺下陣雲深。秦皇城上高高月，長照終童繫虜心。

三
鐵馬冰河入夢寒，戎裝脫去換儒冠。十年面目風塵滿，雨晦鷄鳴把劍看。

春遊
萬事從容付醉中，芒鞋踏遍水西東。春光爛漫無人管，一樹桃花村外紅。

豐臺道中
帽影鞭絲底事忙，客遊十載負春光。豐臺西北迢迢路，流水垂楊似故鄉。

重過保定城南公園
城南非復舊池臺，一代繁華付劫灰。獨坐荒園秋色冷，棠花黃過小橋來。

與閨笏珊連穆如諸兄晚酌歸過新開河堤上月明如畫潮流有聲酒意愈豪矣

狂歌休負少年情，誰計區區身後名。飲罷歸來天色暮，滿堤明月聽潮聲。
種菜

人盡栽花趁微雨，我偏種菜值新晴。閒將仔粒窗前撒，各遇春風各自生。

陶然亭畔

隱隱西山一帶斜，戍樓日晚動悲笳。陶然亭畔清明節，人去人來踏落花。

與諸生遊堤上

飄飄津海客，愛此早春光。兩岸浮潮氣，千帆下夕陽。文章同軌轍，治亂共行藏。堤上團團坐，悠然身世忘。

香山道中

五年不踏香山麓，此日重來欲化仙。萬頃蘆花斜照裏，一聲長笛出漁船。

城西晚眺

去去城西路，微風送夕陰。蟬聲煙外合，山色水邊深。勞矣浮生夢，悠然出世心。林巒幽絕處，留待夢中尋。

書齋夜坐

斗室挑燈坐，門前落葉深。夜長添旅夢，客久變鄉音。浩浩凌雲賦，洋洋流水琴。六年東海畔，誰識腐儒心！

郊外感懷

幽人別有寄，獨嘯上荒陵。大漠沉寒日，長河湧斷冰。烽烟懷故里，樽酒憶良朋。時有悲風起，蕭蕭萬籟騰。

秋暮與李子虞程耀峯孔銓之黃穆如遊郊外相與歌嘯
數載歲寒友，相携沽水邊。高樓收夕照，小市起炊煙。談笑無今古，徘徊互後先。吾生自有樂，何必慕神仙。

與陳子彭劉遜初靳翰池晚眺

携手登古原，遙望津沽路。漠漠夕照中，蟬鳴隔江樹。

北海逢舊

十載相逢鬢欲絲，憑欄閒話不勝悲。五龍亭畔彎彎月，曾照盧姬年少時。

春興

解道春光好，芒鞋遍陌阡。桃花沽酒店，明月釣魚船。自得谿山趣，都忘魏晉年。此情歸不得，長嘯晚風前。

二十五年除夕

守歲圍爐慢引杯，蕭然相對歲寒梅。三冬冰雪都嚐盡，自有春風拂面來。

二

地稅房租差抵補，茶資酒債費籌思。一年大事都完結，尙欠津門除夕詩。

雪夜書懷

淹滯津門又六年，壯懷許國竟徒然。深宵忽觸從戎興，大雪茫茫敕勒川。

西沽道上憶大方

閑踏煙莎携酒來，西沽十里隔雲隈。詩人老去春無主，零落桃花傍水開。

二十六年夏日赴蔣貢梁首席第小酌

疎雨蕭蕭夏日長，樽前欸洽話行藏。盛開菡萏紅翻水，新種芭蕉綠過牆。入夢尋詩都是癖，得錢買畫幾成狂。年來我本平原客，脫穎毛錐欲出囊。

貢公召余充高
檢處書記官

憶楊協老

別後滄桑又一年，尺書欲寄隔雲天。新開河畔潺潺水，碧柳斜陽繫釣船。

相逢

已矣今生事，誰知又伴隨？相逢翻憶別，欲笑竟成悲。潞水都陳迹，蕭郎非少時。燈前凝目看，猶恐夢中期。

有贈

茫茫往事付浮雲，驀地相逢更愴神。七載功名空負我，一身憂患獨憐君。佛非大劫難超悟，人太多情是業因。寄語前途要珍重，黃花雖晚也留芬。

二十六年中秋

萬事蒼茫裏，中天月獨明。親朋餘夢寐，書劍負平生。露滴他鄉淚，花開故國情。如何歌舞夜，萬籟轉無聲？

秋思寄丹亭弟

寂寞清秋裏，四郊烽火侵。暗風撩別夢，細雨滴鄉心。自酌杯中酒，還彈架上琴。感懷何處訴，萬事託微吟。

秋日獨坐窗下爲雪樵亭醇士小景疎柳荒烟隱然有禾黍之感也因題以詩

對泣新亭何所補，首陽採食亦奚爲？禿毫淡墨西窗下，煙水茫茫畫戴鵝。

